



N°2242
Entrée le 22.04.2025
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 22.04.2025
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 22/04/2025

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Bildung, Kanner a Jugend weiderzeleeden.

An der Äntwert op meng parlamentaresch Fro n°2156 huet den Minister geschriwwen, dass déi net-konventionéiert Gestionnairën (also déi privat Betreuungsstrukturen fir Kanner) virun allem am Klengkandberäich eng wichteg Roll spillen an e groussen Deel vum Besoin ofdecken.

Privat Gestionnairë kënnen e Supplement pro Stonn froen. Well et net genuch ëffentlech Betreuungsstrukture ginn, musse vill Elteren hir Kanner deemno an eng privat Struktur setzen an dofir oft kräfteg Supplementen bezuelen. Vill privat Gestionnairë verdéngen sech esou eng gëllen Nues mat deem System, dee mat Steiergelder subventionéiert gëtt.

An deem Zesammenhang wéilt ech dem Minister dës Fro stellen:

1. Dierf eng Privatpersoun, déi eng privat Crèche, déi vum CSA profitéiert, parallel iwwert eng aner Firma, déi der nämmelechter Persoun gehéiert, sech d'Gebäi ofbezuelen mat deem Geld, wat et vum Staat ausbezuelte kritt?
Falls jo, firwat fënnt de Minister, dass dat fair ass?

Mat déiwem Respekt,

GOERGEN Marc
Deputéierten



www.piraten.lu



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro
Nr. 2242 vum honorabelen Deputéierte Marc Goergen**

1. **Dierf eng Privatpersoun, déi eng privat Crèche, déi vum CSA profitéiert, parallel iwwert eng aner Firma, déi der nämmelechter Persoun gehéiert, sech d'Gebäi ofbezuelen mat deem Geld, wat et vum Staat ausbezueelt kritt? Falls jo, firwat fënnt de Minister, dass dat fair ass?**

De Chèque-service accueil (CSA) ass eng finanziell Ënnerstëtzung fir Elteren, déi u Bildungs- a Betreuungsstrukturen (SEA) ausbezueelt gëtt. Dës Hëllef ass u Bedéngunge gebonnen, déi d'Erfëllung vun der Mission de service public viraussetzen, wéi se an der *Loi Jeunesse*¹ definéiert sinn.

Privatpersounen kënnen sech allgemeng an ënnerschiddleche Gesellschaften engagéieren. Am Fall vun net konventionéierten Acteuren am SEA-Beräich ass et net ausgeschloss, datt d'Gestioun vun der Betreuungsstruktur an d'Propriétéit vum Gebai juristesch gesinn an der Hand vun där selwechter Persoun oder deem selwechte Grupp leien. Dës Aktivitéite mussen awer kloer vunenee getrennt sinn a ginn ausserhalb vum CSA-System organiséiert.

D'Utilisatioun vun de Fongen aus dem CSA ënnerleie klore Reegelen: Se mussen dem Fonctionnement vun der Struktur déngen, fir eng qualitativ héichwäerteg Bildung a Betreuung ze assuréieren. Et läit an der Verantwortung vum Gestionnaire vun der Betreuungsstruktur fir sécherzestellen, datt d'Finanzen am Aklang mat de gesetzleche Viraussetzungen an dem Zil vun der Mission de service public verwalt ginn. Dëst gëtt och iwwerpréift am Kader vu Kontrollen, déi de Ministère fir Educatioun, Kanner a Jugend (MENJE) duerchféiert.

D'Hauptprioritéit vum MENJE bleift et, déi ëffentlech Mëttel esou anzesetzen, datt se direkt de Kanner an hirem Bildungs- a Betreuungsliewen zeguttkommen, an eng héichwäerteg an accessibel Offer fir all Famill ze ënnerstëtzen.

Lëtzebuerg, de 6. Juni 2025

De Minister fir Educatioun,
Kanner a Jugend

(s.) Claude MEISCH

¹ *Loi modifiée du 4 juillet 2008 sur la jeunesse*